



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

**Dissertatio Theologica De Formulari Ab Illustrissimis  
Episcopis Belgii Proposito In Causa Jansenii**

**Claremontius, Johannes**

**Coloniæ, 1693**

Præfatio Refertvr Occasio Scribendi.

**urn:nbn:de:hbz:466:1-40333**

DISSERTATIO  
 THEOLOGICA  
 DE  
 FORMULARI  
 AB ILLUSTRISSIMIS  
**EPISCOPIS BELGII**  
 PROPOSITO  
*IN CAUSA JANSENII*  
 PER  
**JOANNEM CLAREMONTIUM**

S. Theologiæ Professorem, Presbyterum Sæcularem.

PRÆFATIO  
*REFERTUR OCCASIO SCRIBENDI.*

**Q**uantum mihi per otium licuit, promissam in postremo congressu nostro dissertationem expedivi, quâ te ad meliorem mentem, quantum fieri posset, pertraherem. Causam enim commotionis animorum quæ in Belgio perstrepit, in Illustrissimos Antistites coniiciebas, quasi subscriptionem Formularis, quo sensus Jansenii ejuraretur, importunè & injustè exigerent. Ego ex adverso perturbationis auctores asserebam esse Theologos qui se refractarios in eo negotio exhibebant. Tu nullam tumultuationem ante consilium Præsulum excitatam asseverabas: tum ego ex te quæsivi: quid igitur sibi vellent Libelli, Theses, aliaque scripta quæ in dies prodibant, ad animos accendendos?

A

Ad-

Addidi Illustrissimos Antistites non potuisse dissimulare , damnatos ab Ecclesiâ errores impunè disseminari, quorum cura si acriorem motum in animis dissentientium excitavit , non illis vitio , sed iis qui mentem infectam haberent , quosque purgare intendunt , verti debere. Cum enim fortis armatus custodit atrium suum , in pace sunt omnia quæ possider : si autem fortior eo superveniens vicerit eum &c. Hic tu me interpellasti , non ferens homines à me notari doctrinâ ac pietate conspi cuos. Cui ego respondi : nihil à me actum , quod in Antecessores ipsorum non egerit Urbanus VIII. Magno mærore afficimur , inquit , quod plerique spectatae aliqui probitatis & doctrinae , in varijs sententias offensionis & periculi plenas , tum verbo tum scriptis prorumpunt. Ideò te cum Tertulliano lib. de præscript. interrogabam : ex personis probamus fidem , an ex fide personas ? Nemo mihi sapiens , nemo fidelis , nemo major , nisi Christianus : nemo autem verè Christianus , nisi qni obediens fuerit Ecclesiæ Filius. Querant nimurum infirmi in fide , inquit idem , quare illi fidelissimi & prudentissimi & usitatissimi in Ecclesiâ in illam partem transferant ? Ad quæ respondet : quis hoc dices non ipse sibi respondit : neque prudentes neque fideles , neque usitatos estimandos quos hereses aliique errores petuerunt demutare. Plura hanc in rem prosecuturus eram testimonia , cum iterum filum abrupisti , hæc reponens : non patior Viros à me colendos in suspicionem hereticoꝝ adduci , recta ipsi sapiunt. Unum illis obiicere tantum potes , quod in quæstione Facti decretis Pontificum non assentiant. Istud autem probro illis duci non debet , quod & auctoritas decernens sit fallibilis , & ipsi contrarium habeant sibi perspectum. Ad hæc subjeci : quid illi intus sentiant non penetrio , parietem non effodio : quamquam interiora scriptis sæpe prodant , quibus minus recte sapere non mihi soli videntur. At istud unum , quod aīs , num tibi tam exiguum & sanum est ? Multos certè offendit & vehementer dat suspicionem , non haberi ab illis hereticum quod Pontifices hereticum dixeré : atque idè ipsos idem sentire. Fallibilem aīs auctoritatem cui non acquiescunt : sed maximè verendum ne infallibili quoque non cederent , qui quod clarè & dilucidè ipsi concipiunt , verum habent; Ipsi , inquam , non alii : quasi apertius dicent , in quibus intelligentia nostra se erigit , reliquorum hominum & ipsius Ecclesiæ sensus dormit. S. Greg. lib. 5. moral. in Job. cap. 19. Scandalum istud , inquiebas , Pharisæicum est , quod multis jam editis libris est elutum. Laverunt æthiopem , dicebam , qui nullis librorum undis elui potest. Stat enim , stabitque in perpetuum Ecclesiæ judicium , quo lensus Jansenii turpi nigredine est foedatus. Fallibile dicant illi

illi qui se infallibles putant. Dicere tamen apertius debebant qui mentem altius erigunt, judicium istud fallere & falli. At infallibile dicunt alii, nec omnino fallere vel falli. Quid tu hic, qui tutiora sequenda prædicas, sed non sequeris? non est tutum, inquiebas, jurare incertum. An putas, dixi, Ecclesiam juramenta exigere in incertis? Hoc esset in jure turpiter errare. Esto, aiebas, certum istud illi fuerit: at mihi est incertum. Ergo, inquiebam, juret ipsa, non juramentum ab aliis exigit, nec iterum in jure aberret. De hoc, aiebas, fuit admonita & substituit: nec enim illius jussu juramentum amplius audent Episcopi urgere. Parum absuit quin exclamarem: ô inverecundum caput, qui Ecclesiam officii sui admonendam putas! Sed si hæc admonitio dicenda est, inquiebam, jam inde ab initio fuit admonita, nec acquievit. Formulam siquidem juramenti eandem huc usque proposuit in Galliâ, quod etiamnum passim exigitur. Dicas igitur, si audes, illam adhuc in suo errore permanere. Ad hoc dixisti, aliam in Galliâ propositam fuisse viam, quo conscientiæ consuleretur; externam nimirum reverentiam exigi tantum, quâ nihil ex adverso dicatur aut scribatur. Hanc importunè præcluserunt Illustrissimi Belgii Antistites; & ideo supercedere coacti sunt. Non importunè inquiebam, sed oportunè præcluserunt hanc viam, & ad mentem præscripti Formularis, quò certius fidei consulerent, quam multis ambagibus à quibusdam subditis suis cludi videbant. At tune paratus essem in hunc modum jurare, externam tantum reverentiam profitendo? Hic hæsisti dubius: dubius, inquam. Quid enim aliud mora, quam dubitationem expressit, quod & ipso responso manifestasti: dixisti enim te deliberaturum dum occasio se offerret, quod nunquam amplius futurum confidenter asleverabas. Merito tamen dubitasti, quamvis aliam viam indicasses, quò conscientiæ consuleretur. Nam in hoc ipso disjecti sunt partiarii tui, ac sicut dicitur Lutheranorum alios esse rigidos, molles alios; ita plerique ex tuis viam illam aversantur, quam alii inierunt. Hi nimirum timori cesserunt, atque ne censuras, aliasque pœnas incurrerent, modum commenti sunt, quem nec laxissimi Casuistæ probare unquam possent. Admisisti illos in hoc puncto dissentire, sed amicabiliter, sibi invicem sua sensa donando: atque identidem illa Apostoli verba inculcas, quisque suo sensu abundet, si quid aliter sapit, & hoc spiritus Sanctus vobis revelavit. Utinam, inquiebam, ex hoc ipso discerent, cum Casuistis moderatius agere, nec insectari in casibus ab Ecclesiâ necdum decisis. At patienter ferre sensus ab illâ reprobatos, quid aliud est quam politicè agere, in malo consentiendo, perversa dissimulando?

Tum quæsivisti, quinam sint illi sensus quos dissimulari ab ipsis contendebam? Respondi imprimis esse irreverentiam illam externam quâ quidam ex ipsis propositioni Ecclesiæ palam obiectando, formulam ab eâ præscriptam jurare renuunt, & sensum Jansenii Catholicum esse contendunt. Hanc alii reprobare tenentur qui reverentiam externam Ecclesiæ deberi sentiunt & ipsimet præstant. Deinde splendidum illud mendacium ac perjurium, quo alii sincè profitentur quod interius non credunt: quod sanè priores exhorrent; & ideo quibusvis exponi censuris & poenis malunt, quam jurare in formulam præscriptam. Nec sanè immeritò. Quid enim intersit inter sensum illorum qui reverentiam illam externè tantum exhibent & sensum propositionis XXVIII. ab Innocentio XI. damnatæ nunquam ostendent: nisi quod in materia ad religionem spectante juramento abuti turpius inveniantur. Ad hæc addebam, utrosque judicium Ecclesiæ in causâ Jansenii vel falsum vel dubium tenere, quod à genuinis Ecclesiæ filiis verum & certum haberi debet. Hic tu exclamasti, te genuinum esse filium Ecclesiæ: nec idcirco te cogi ad ipsius judicium pro certo habendum, quod in sensu Jansenii dijudicando & fallibile sit & à pluribus Theologis falsum aut incertum asseritur. Itaque confers paucos hos Theologos, inquietabam, cum Ecclesia pars sunt apud te auctoritatis? Adeò apud te vilescit hujus auctoritas, quam genuini omnes filii summâ veneratione & fide dignam existimant, cui nulla in terris comparari potest? Sed quâ certitudine fallibile dicis ejus judicium, quod infallibile ab aliis asseritur? Cur his contradictibus hoc ipsum apud te non est incertum potiori jure, quam sit factum Jansenii propter contradictionem tuorum? Cur inquam, sic te judicio Ecclesiæ non subjicis fidem internam illi præstanto, ne infallibili forte judicio imprudenter resistas, & ut tutiora sequaris? Denique falsum dicis & incertum à multis asseri judicium Ecclesiæ in facto Jansenii. At longe plures sunt, qui certissimè verum esse asseverant, & ipsa Ecclesia Juramentum exigens hoc manifestè supponit. Non dicam quod hisce ac præsertim Ecclesiæ, sensum tuum conformare tenearis, quod verissimum est: sed quia quasi incertus de rei veritate præscindere vis aut singis, dicens sensum Jansenii esse incertum; & hoc ipsum, an sit incertus cogeris fateri esse incertum. Itaque si certum sit sensum Jansenii esse damnum, licet illius damnationi cum juramento subscribere: si incertum sit, non licet: & quia utrumque apud te est dubium; videlicet an hoc certum aut incertum sit, dubium est an liceat an non liceat. Verum, dubium non est nos obligari Superiorum præceptis in re dubiâ obedire. Ideò accedente

dente S. Sedis Apostolicæ auctoritate formulam juramenti præscriben-  
te , quâ sincerè ejuretur sensus à Jansenio intentus , Illustrissimis E-  
piscopis eam exigentibus , teneris obedire , fidem internam juxta eo-  
rum mentem præstanto in eâ ejuratione. Accedit scandalum fidelium  
nisi idem sensus in hunc modum ejuretur , & vehemens suspicio quæ  
incurritur de hæresi , quæ duo sunt peccata certa. Atqui certum est  
hominem constitutum inter duo mala sive peccata , quorum unum est  
certum alterum incertum , teneri vitare certum exponendo se pericu-  
lo dubii committendi. Ergo ut vites hæc duo peccata certa , certò te-  
neris sincerè ejurare sensum à Jansenio intentum , fidem internam quæ  
exigitur Ecclesiæ præstanto. Audiam lubens , inquietam , quid ad  
hæc respondere valeas. Tunc causatus es me multa innectere implexa ,  
quæ ut dissolvantur accuratiorem exigant attentionem , quam sermo-  
cinatio patiatitur. Ideò petivisti ut scripto hæc tibi traderem. Simul ex-  
postulasti , ut si quid apud me haberem quo obligationem in formu-  
lam præscriptam jurandi mihi persuaderem una proferrem. Utrumque  
executus sum : primum quidem refriando memoriam eorum quæ  
in colloquio proposita fuere : secundum autem in sequentibus accipe ,  
& æqui bonique juxta conscientiæ dictamen & stimulos consule. Non  
hic attendas velim cuiusquam hominis auctoritatem , non amorem , non  
ingenium , non eloquentiam , non Philosophiam : sed hæc cuncta despici-  
ens , quidquid Ecclesiam tenuisse cognoveris , id solum tibi tenendum cre-  
dendumque decernas. Ita te monet Vincentius Lirinensis in Commonie-  
torio.

## §. I.

*Exponitur quam ob causam Formulare fuerit editum ,  
& quomodo Jansenistæ illud exceperint.*

**Q**uinquaginta abhinc annis Janseniana hæresis (absit verbo invidia ,  
quod post oraculum S. Sedis usurpare licet ) Ecclesiam tech-  
nis & pertinaciâ laceffere non destitit. Illa siquidem tortuosi instar co-  
lubri , cädem teste Sede , in varios gyros versa effugium & latebras ,  
quibus jacula Apostolica declinaret , mirum in modum investigabat ,  
præsertim per distinctionem Juris & Facti. Cum èce Regis Christia-  
nissimi & Galliæ Episcoporum voto Alexander VII. annuens , sapi-  
enti sanè consilio , Formulare Juramenti edixit , cui Universus Ordo  
Ecclesiasticus subsscriberet. Ut videlicet Constitutioni Innocentii X.

&amp;c